

To'on yó'o kían nì taa San Pablo nì sa'an noo Filemón

Ká'an Pablo ndisá'an xí'ín Filemón

1 ¹ Yu'u kúu Pablo, ta nákaaí ve'e kaa sa'á ña dána'i to'on Jesucristo. Ta yu'u xí'ín ñani yo Timoteo ká'an ndu ndisá'an xí'ín míí ní, ñani maní Filemón, chí míí ní kúu na kéchóon dáó xí'ín ndu'u, ² ta ká'an ta'ani ndu ndisá'an xí'ín kì'o maní yo naní Apia, xí'ín ñani yo Arquipo, na chindeé tá'an xí'ín yó sa'á to'on Jesús, ta ká'an ta'ani ndu ndisá'an xí'ín na kúu kuendá Jesús náataka ve'e ní. ³ Ta míí tatá yo Ndios xí'ín sato'o yo Jesucristo ná kee ña maní xí'ín ndo'ó, ta ná kì'o na ña koo va'a ini ndo.

Kándéé ká'ano iní Filemón Jesús, ta kú'u ini na sa'a dao ka ñayuu

⁴ Ta náki'oi ndivé'e noo Ndios, chí daá kuití ndíko'on iní míí ní noo ká'in xí'ín ná, ⁵ dá chí kándaá iní ña kóni ní sato'o yo Jesús, ta kándéé ká'ano iní ñaá ní, ta kú'u ta'ani ini ní sa'a ndidaá ñayuu Ndios. ⁶ Ta sa'á ña iin nì nduu ní xí'ín ndu'u sa'á ña kándéé iní ní Jesús, sa'á ñoó xíka ndu noo Ndios ña kandaá ini ní sa'a ndidaá ña va'a ió noo ní sa'á ña kúu ní kuendá Cristo Jesús. ⁷ Kádii nda'o iní, ta nì ndundeé cháá ka iní tá nì kandaá iní ña kú'u nda'o ini ní sa'a dao ka na kúu kuendá Jesús. Dá chí sa'a míí ní, ñani míí, nì naní'i ini cháá ka ñayuu Ndios tandeé iní.

Yó'o xíka Pablo iin ña maní noo Filemón

⁸ Ta sa'á ña dión kían, sa'á ñoó va'ará ió choon nì xì'o míí Cristo noóí ña ka'andai choon noo ní táto'on kánian kee ní, ⁹ tído di'a xíkaj ña maní noo ní sa'á ña kú'u ini sa'a sátá'an yó. Ta yu'u kúu Pablo, na ká'an xí'ín ní, ta kúu iin na sava'a, ta nákaa yu'u ve'e kaa sa'á ña dána'i sa'á to'on Jesucristo. ¹⁰ Xíkaj ña maní noo ní sa'a Onésimo, chí kúu rá táto'on iin de'e nì nì'í noo nákaaí ve'e kaa yó'o sa'á ña kándéé iní ra Jesús. ¹¹ Chí di'a iin ta kó chón nì sa kuu ra noo ní tá sata, tído viti kían kúu rá iin ta ió choon noo míí ní xí'ín noo yú'u.

¹² Ta ko'in chinda'í ra nasaa ra noo ní, tído kónii ña natiin va'a ní ra, chí táto'on ndó'i xí'ín nímaí, kì'o dión ndó'i xí'ín rá. ¹³ Kónii ña koo ra yó'o xí'ín, dá chindeé rá yu'u kuiin ra to'on noo míí ní, chí nákaaí ve'e kaa yó'o sa'á ña dána'i to'on va'a Jesús. ¹⁴ Tído o kée ta'on yu'u dión, chí kó ñá'a ta'on nachina'í míí ní. Kó kónii kendúsaj xí'ín ní kee ní ña maní yó'o, chí kónii ña ná kakuuan táto'on kì'o kóni míí ní.

¹⁵ Dá chí ndá ndi kuu nì sonó Ndios ña nì kuxoo ra cháá tiempo noo ní, dá viti kían nandió koo ra kosaa ra koo chíchí rá xí'ín ní. ¹⁶ Ta viti natiin va'a ní ra, chí kúu rá iin ta ndáya'i cháá ka o duú iin ra nákaa tixi ndá'a

ní, chí viti kúú rá iin ñani maní yò. Kúú rá iin tą ndáya'i noo yú'u, tído ndáya'i cháá ká rá noo mií ní sa'á ña koni kuáchí tuku ra noo ní, xí'ín sa'á ña ni nduu ra iin ñani ní sa'á ña kúú rá kuendá sato'o yò Jesús.

¹⁷ Sa'á ñoó, tá miían ndaa nákoní ní ña né'e tá'an va'a ní xí'ín yu'u, dá kían natiin va'a ní rá, ta kee ní kuendá ña mií yu'u kúú rá. ¹⁸ Tá ndá ña'a ni ya'a ra ni kee ra xí'ín ní, o tá táí rá noo ní, dá kían nachí'i nían kuendá yu'u. ¹⁹ Yu'u kúú Pablo, ta xí'ín ndá'a miíí táai to'on yó'o kosaan noo ní. Yu'u chiya'i noo ní, va'ará di'a kuu kaai xí'ín ní ña táí ní sa'a mií ní nooí. ²⁰ Sa'á ñoó, ñani miíi, ió tandeé iníi xí'ín ní ña kee ní ña maní yó'o sa'á ña kúú yó kuendá sato'o yò Jesús, ta kí'o ta'ani ní tandeé iníi sa'á ña kúúó ñani kuendá Jesús.

²¹ Ta ni taai tuti yó'o kosa noo ní, chí kándéé ká'ano iníi ña kueídó'o ní yu'u. Ta sa ná'á vái ña va'a cháá ká kee ní noó ña ká'in xí'ín ní. ²² Ta kóni ta'anii ña kenduu ndo noo kooi, dá chí kándéé iníi ña xinkoo ña xíka ndo noo Ndios, dá kí'o na ña saai noo ndéi ndó xaan.

Ká'an ta'ani dao ká na kúú kuendá Jesús ndisá'án xí'ín Filemón

²³ Ta ká'an ñani yò Epafras ndisá'án xí'ín ní. Na yó'o kúú na nákaa nduú xí'ín yu'u ve'e kaa sa'á ña dána'a na sa'a Cristo Jesús. ²⁴ Ta ká'an ta'ani Marcos, xí'ín Aristarco, xí'ín Demas, xí'ín Lucas ndisá'án xí'ín ní. Na yó'o ta'ani kúú na chindeé tá'an xí'ín yu'u noo choon Ndios. ²⁵ Ná koo ña maní xí'o sato'o yò Jesucristo xí'ín iin rá iin ndó. Díon ná koo.